



Inatsisip atuutsinneqartup Naalakkersuisut kingusinnerpaamik UPA 2017-imi allanngortinnissaanut siunnersuummik suliniuteqaqqullugit siunnersuut. Taamaaliornikkut ilagiit sinniisaannut qinikkatut sulineq allatulli qinigaaffittut atuutilerseqqullugu. (Inatsisartunut Ilaasortaq: Anthon Frederiksen, Partii Naleraq)
(Inatsisartunut ilaasortaq Anthon Frederiksen, Partii Naleraq).

Inuit Ataqatigiit Anthon Frederiksen, Partii Naleraq qutsavigiumavaat ilagiit sinniisaasa inissisimanagerat pillugu siunnersuuteqarneranut.

Isumaqarpugut ilagiit sinniisaani sulineq pingaaruteqarluinnartuusoq. Ulluinnarni ilagiit ingerlanerat, palasinillu suleqateqartarnek pingaaruteqarpoq.

Inuit Ataqatigiit Anthon Frederiksen isumaqatigaarput oqarmat ilagiit sinniisaanni qinikkat ilaasa oqaloqatigisarneranni paasinarloq, ilagiinni sullissineq arlalitsigut naleqqussarneqartariaqalersimasoq.

Sinerissami ilageeqarfinni ilagiit sinniisaasa oqaluffimmut sullissilluarnerat takujuartarparput. Naalagiani takujuartarparput ilagiit sinniisaasa peqataalluarnermikkut oqaluffipput iseruminarsarlugulu palasillu suliaannik oqilisaasarnerat takujuartarparput.

Manna iluatsillugu sinerissami ilagiit sinniisaasa qasujuillutik suliuarnerannut qujajumavugut.

Akuttunngitsumik apeqqutigineqartarpoq ilagiit sinniisaat sunik akisussaaffeqarnerisut.

Apeqqutigineqartumi inuit uku oqartussaasut, tassa provsteqarfiit, palaseqarfiit, biskoppeqarfiullu akornanni suleqatigiinneq ingerlatsivittut oqartussaasuni tunngavigineqartut malillugit ingerlanneqartarpoq. Tassalu assersuutigalugu allakkat attaveqatigiinnerillu pisortani aaqquussusaanerit assigiinngitsut aqquusaqqaarlugit ingerlanneqartarlutik.

Ilagiittut malunnartarpoq oqaluffiit ilaanni palasissaaleqineq ajoqissaaleqinerlu apeqqutaatillugit ilagiit sinniisaasa assigiinngitsunik suliaqartinneqartartut. Naalagiartitsinerit, kuisitsinerit ilaatigullu ilisinerit suliarisariaqartarpaat. Kialluunniit takorloorsinnaavaa palasitut ilinniarsimasuunngikkaanni, naalagiartitsisinnaaneq ilisisinnaanerluunniit inummut suliasaasoq annertoq oqimaassinnaasorlu.

Taamaammat ataatsimiinneriutit saniatigut ilagiit sinniisaasa suliat aallaavigalugit iluamik akilerneqartarnerisut Inuit Ataqatigiit misissorumavaat.

Nalunngilarpummi ilagiit sinniisaat ataatsimiinnernut peqataanerminnut provstit allaffiit aningaasarsitinneqartartut. Akit atorneqartut qanoq annertutiginissaat ataatsimiinnerit sivilissusaasa aalajangertarpaat. Tamakku erseqqinnerusumik takuneqarsinnaapput Provsteqarfinni ataatsimiititaliani ilagiillu sinniisaanni ilaasortanut qinikkanut ullormusianik, angalanermi ineqarnermilu iluarsisutininik kiisalu sulinermit isertitassaraluanik annaasanut taartisiassanik tunniussisarnek pillugu Namminersornerullutik Oqartussat nalunaarutaanni nr. 32, 17. december 1996-imeersumi.

Inuit Ataqatigiinni ilagiit akissarsiaqarnerannik oqaloqatigiinnermut peqataajumavugut. Siunnersuut una ataatsimiitsitaliamut susassaartumut ingerlakkumavarput.

Isumaqarpugut ataatsimiitsitaliap misissussagaa ilumut kommunalbestyrelsemi qinikkatulli ilagiit sinniisaat akissarsitinneqassanersut. Inuit Ataqatigiilli nalilersorteqqaarusuppaat suliat assigiinngitsut ilagiit sinniisaasa suliarisartagaat assigiinngitsutigut akissarsiat iluarsineqarsinnaanersut.

Ilagiit sinniisaanni, aamma inuusuttut, allallu kajumittut sulisinnaanissaat kajuminnarsarumallugu ataatsimiitsitaliami suliarinissaa qilanaaraarput, oqallinnermullu peqataajumalluta.